

Interpellasjon til Heradstyret 13.10.21

Barnevernlova har som føremål å sikre at barn og unge som lever under forhold som kan skade deira helse og utvikling får naudsynt hjelp og omsorg i rett tid, samt at barn og unge skal sikres trygge oppvekstvilkår. Dette er slått fast i §1-1. Vidare seier lova i §2-1 noko om kven som har ansvaret etter denne lova. I første setning her, vert det slått fast at: «Kommunen er ansvarlig for å utføre de oppgaver etter loven som ikke er lagt til et statlig organ». Omgrepet «kommunen» er i denne samanheng Heradstyret. Me som Heradstyre har difor eit klart ansvar for å syte for at alle tenester som vert ytt utifrå denne lova, er i tråd med lova og lova sin intensjon. Det er altså med klårare ord vårt ansvar som folkevalde å syte for at alle barn og unge i Osterøy kommune vert sikra trygge oppvekstvilkår.

Barnevernslova stiller også eit vilkår til for oss som kommune. I barnevernlova §2-1 siste avsnitt slår lova fast at «Kommunestyret selv skal minst én gang i året få en redegjørelse om tilstanden i barneverntjenesten.» Dette har vore noko varierende praktisert i Osterøy kommune. Likevel er det liten tvil om at kommunestyret skal haldast orientert om tilstanden i si eiga barnevernsteneste.

I den seinare tid har det vore gjennomført ein del tilsyn frå statsforvaltaren i ein del saker som er knytt til barnevernet i Osterøy. Ein del av desse tilsyna har påpeika ymse manglar av ulik alvorsgrad. Det er og vorte kjent at det er kome inn varsel frå tilsette om tilhøve som gjeld tenesta. Me kjenner ikkje innhaldet i varselet, men finn samandraget som er publisert i media såpass omfattande at det er urovekkande. Når tilsette vel å gå til det steget å sende varsel om sin eigen arbeidsstad og arbeidssituasjon, skal og bør det takast på stort alvor. Den eller dei tilsette som vel å sende varsel, utset seg sjølve for store påkjenningar og er normalt klar over at eit varsel vil medføre at dei sjølve endar med å forlate jobben sin.

Me opplever og at tenesta har noko høgt sjukefråvær. Dette er i og for seg naturleg i ein svært krevande jobb at det vert noko sjukmeldingar, men når me ligg over andre kommunar bør dette og være signal som gjer at saka vert sett nærare på.

Summen av varsel, tilsyn og sjukefråvær gjer at me no vurderer det som naudsynt å få ei grundig og ekstern vurdering omkring barnevernstenesta i Osterøy kommune. Me bed derfor om at heradstyret tek stilling til, og røystar over følgande framlegg:

Heradstyret gjer vedtak om at det vert sett av midlar i budsjettet for 2022 til å ha ei ekstern gransking av barnevernstenesta i Osterøy kommune. Administrasjonen hentar inn prisar og gjer heradstyret kjent med desse i god tid før budsjettet skal endeleg vedtakast. Granskinga skal føregå første kvartal 2022. Granskinga skal ta utgangspunkt i tilsynsrapportar dei siste åra, samt varsel som innsendt.

For Osterøy Frp

Kim Andre Hartveit

Alf Terje Mortensen

R. Tyssebotn
Ragnar Johan Tyssebotn